

CONGREGATIO DE CAUSIS SANCTORUM

TAURINENSIS

BEATIFICATIONIS et CANONIZATIONIS

SERVAE DEI

MARIAE AB ANGELIS

(in saeculo: IOSEPHAE OPERTI)

FUNDATRICIS

CONGREGATIONIS SORORUM CARMELITARUM A S. TERESIA TAURINI
MONIALIS PROFESSAE ORDINIS CARMELITARUM DISCALCEATORUM

(1871-1949)

DECRETUM SUPER VIRTUTIBUS

«Propter hoc ecce ego lactabo eam et ducam eam in
solitudinem et loquar ad cor eius» (*Os* 2, 16).

Servae Dei Mariae ab Angelis (in saeculo: Iosephae Operti)
vehemens spiritualitas omnino posita in suipsius colloquio cum
Domino, ad instar exemplaris ab Osea praeannuntiati, generosum
in ministerium erga proximum irrupit.

Serva Dei Taurini die 16 mensis Novembris anno 1871,
minor natu e Iacobo Operti officiali Ministerii Publici Aerarii

Italici Regni et e baronissa Adelis Sinaglia, orta est et duos post dies sacro fonte lustrata. Christiano more in familia instituta, nono anno aetatis suae primitus sacram ad mensam accessit.

Mox aerumnae eius in vita non defuerunt: enim anno 1885 eius frater undevicesimo anno aetatis tabe mortuus est et vix post tres menses et pater eius e vita excessit. Parva Iosepha et mater eius solae manserunt totamque suam fidem in Deum conferentes summo illo dolore obstiterunt. Se ergo omnino tradiderunt operibus caritatis et curae sacrorum suppellectilium suarum ecclesiarum parochialium Taurini et loci v. d. *Marene*, in quo parvo oppido praedia possidebant, praeterea uterque simul sacras peregrinationes ad nonnulla tam Italica quam extera sanctuaria exegit. Ex iis peregrinationibus cum apud fanum Beatae Mariae Virginis Oropensis erant, Iosepha quinto decimo aetatis suae anno Carmelitarum spiritualitatem primitus cognovit, quae animam eius valde permeatura esset. Hac re die 17 mensis Iunii anno 1886 una cum matre tertium Ordinem Carmelitarum ingressa est.

Vicesimo anno aetatis Serva Dei cognovit se consecratam esse ad vitam religiosam, matrem tamen relinquere se non posse sciebat. Aestate anni 1893, cum eius ultima amita mortua sit, heres fuit familiae multorum bonorum, ex hoc ei multae uxoriae condiciones perrectae sunt.

Eodem anno incitamentum recepit, instanter positum a variis sacerdotibus, ad institutionem pro puellis pauperibus constituenda. Hac re, sequenti anno, Operti familiae in palatio, in pago *Marene*, Institutum Sancti Ioseph inauguratum est. Ex incitamento Taurinensis Archiepiscopi communitatem Sororum Carmelitarum a Sancta Teresia Taurini fundavit, ut vita contemplativa cum vita activa, maxime in puellis pauperibus et parentibus orbatis in-

stituendis, coniungeretur. Iosepha Carmelitarum veste se induit, nomen sororis Mariae ab Angelis sumens, et priorissa nominata est.

Postea Institutum duobus in ramis disiunctum est, scilicet claustrale et vitae activae. Soror Maria ab Angelis una cum sororibus, quae eandem vitae disciplinam claustralem elegerant, pie se recessit. Ex hac laceratione nonnullae fuerunt difficultates, quae Servae Dei dolores attulerunt.

Secundo bello mundano flagrante, angustissimis in nodis etiam bomborum ob percussionem fuit monasterium. Ipsa fundatrix tribus cum sororibus se apud castellum Salsae in loco *Marene* recipere debuit.

Humanae et christianae virtutes Servae Dei necnon religiosae consecrationis merita eius in vita clare enituntur. Religiosa institutio in familia impertita eius spirituali in experientia eximium pondus habuit. Mulier fuit firmissima in fide, veram communionem cum Domino traduxit et ad instar Iesu Crucifixi totum amorem suum erga eo occurrentes profudit. Vehementi fidei intuitu sui ambitus necessitates bene intellexit, quae novo saeculo ingrediente multas culturales et sociales mutationes pariebant. Istis in adiunctis non sine difficultatibus suam pervenit ad maturitatem, quae in ferventi sui oblatione in Dominum per orationem una cum magna humanitate et generositate suo in ministerio ad effectum venit.

Virtutum exercitium, enisum ab absoluta sui commendatione in Deum, ei cotidia fuit experientia, quae suis consorioribus et spiritualibus filiabus clare percipiebatur. Eius industria firmissima super spe fundabatur atque congruenter cum desiderio contemplationis et adorationis componebatur. In veneratione erga Iesum Christum vixit secundum Regulam Carmeli, magnam alens cupidi-

tatem erga Christi humanitatem in Eucharistia, cum Maria, vera divitia suae vocationis. Omnino sui oblita, Mater Maria, altissima serenitate animata videbatur eique audiendi et discurrendi de proximorum necessitatibus promptitudo non defuit, omnia denique summa simplicitate ad maiorem Dei gloriam et fratrum salutem convertebat.

Quibusdam quaestionibus administrativis ac iuridicis ob acceptionem ditissimae hereditatis ipsa implicabatur, omnibus tamen in casibus Serva Dei prudentia et contemptione rebus in mundanis se gessit atque constanti itinere perfectionis ad plenam adhaesionem divinae voluntatis, mystica sui derelictione, pervenit.

Post bellum valetudo sua in peius magis magisque versa est. Die 7 mensis Octobris anno 1949, post quadraginta annos claustralis vitae, Soror Maria ab Angelis diem supremum obiit.

Fama sanctitatis, a die 21 mensis Ianuarii anno 1991 ad diem 6 mensis Octobris anno 1995 iuxta Curiam ecclesiasticam Taurinensem Inquisitio Dioecesana celebrata est, cuius iuridica validitas ab hac Congregatione de Causis Sanctorum per decretum diei 8 mensis Novembris anno 1996 est approbata. Exarata *Positione*, die 21 mensis Maii anno 2013 habitus est Historicorum Consultorum Congressus. Deinde canonicas secundum normas disceptatum est an Serva Dei heroicum in gradum virtutes exercuisset. Positivo cum exitu, die 1 mensis Decembris anno 2016 Peculiaris Consultorum Theologorum Congressus locum habuit. Patres Cardinales et Episcopi Ordinaria Sessione diei 16 mensis Maii anno 2017 congregati, me Angelo Cardinale Amato praesidente, Servam Dei heroico in gradu virtutes theologales, cardinales et adnexas exercuisse agnoverunt.

Facta demum de hisce omnibus rebus Summo Pontifici Francisco per subscriptum Cardinalem Praefectum accurata relatione, Sanctitas Sua, vota Congregationis de Causis Sanctorum excipiens rataque habens, hodierno die declaravit: *Constare de virtutibus theologalibus Fide, Spe et Caritate tum in Deum tum in proximum, necnon de cardinalibus Prudentia, Iustitia, Temperantia et Fortitudine, iisque adnexis, in gradu heroico, Servae Dei Mariae ab Angelis (in saeculo: Iosephae Operti), Fundatricis Congregationis Sororum Carmelitarum a S. Teresia Taurini, Monialis Professae Ordinis Carmelitarum Discalceatorum, in casu et ad effectum de quo agitur.*

Hoc autem decretum publici iuris fieri et in acta Congregationis de Causis Sanctorum Summus Pontifex referri mandavit.

Datum Romae, die 16 mensis Iunii a.D. 2017.



ANGELUS Card. AMATO, S.D.B.
Praefectus



✠ MARCELLUS BARTOLUCCI
Archiep. tit. Mevaniensis
a Secretis